

---

OFFERYNNAU STATUDOL CYMRU

---

**2012 Rhif 1904 (Cy.231)**

**ADDYSG, CYMRU**

**Gorchymyn Cyngor Cyllido Addysg Uwch  
Cymru (Swyddogaethau Atodol a Dirymu) 2012**

|                                   |         |                    |
|-----------------------------------|---------|--------------------|
| <i>Gwnaed</i>                     | - - - - | 18 Gorffennaf 2012 |
| <i>Gosodwyd gerbron Cynulliad</i> |         |                    |
| <i>Cenedlaethol Cymru</i>         | - -     | 19 Gorffennaf 2012 |
| <i>Yn dod i rym</i>               | - -     | 31 Awst 2012       |

Mae Gweinidogion Cymru, drwy arfer y pwerau a roddwyd i'r Ysgrifennydd Gwladol gan adrannau 69(5) a 89(4) o Ddeddf Addysg Bellach ac Uwch 1992(1), ac sydd bellach yn arferadwy ganddynt hwy(2) yn gwneud y Gorchymyn a ganlyn:

**Enwi, cychwyn, cymhwyso a dehongli**

1.—(1) Enw'r Gorchymyn hwn yw Gorchymyn Cyngor Cyllido Addysg Uwch Cymru (Swyddogaethau Atodol a Dirymu) 2012 a daw i rym ar 31 Awst 2012.

(2) Mae'r Gorchymyn hwn yn gymwys o ran Cymru.

(3) Yn y Gorchymyn hwn—

(a) ystyr “Rheoliadau 2011” (“*the 2011 Regulations*”) yw Rheoliadau Grantiau a Benthyciadau Dysgu'r Cynulliad (Addysg Uwch) (Cymru) (Rhif 2) 2011(3); a

(b) mae i “grant newydd at ffioedd” (“*new fee grant*”) yr ystyr a roddir iddo gan reoliad 2(1) o Reoliadau 2011.

**Dirymu**

2. Mae Gorchymyn Cyngor Cyllido Addysg Uwch Cymru (Swyddogaethau Atodol) 2011(4) wedi ei ddirymu ar 31 Awst 2012.

---

(1) 1992 p.13; diwygiwyd adran 89(4) gan [Ddeddf Addysg Bellach a Hyfforddi 2007](#) (p.25), adran 29 ac Atodlen 1, paragraff 11.  
(2) Trosglwyddwyd swyddogaethau'r Ysgrifennydd Gwladol o dan adran 69(5), i'r graddau yr oeddent yn arferadwy o ran Cymru, i Gynulliad Cenedlaethol Cymru gan Orchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672). Yn rhinwedd adran 162 o [Ddeddf Llywodraeth Cymru 2006](#) (p.32), a pharagraff 30 o Atodlen 11 iddi, mae'r swyddogaethau hynny'n arferadwy gan Weinidogion Cymru.  
(3) O.S. 2011/886 (Cy.130).  
(4) O.S. 2011/965 (Cy.139).

### Swyddogaethau Atodol

3. Mae'r swyddogaethau a ganlyn, sef swyddogaethau Gweinidogion Cymru o dan Reoliadau 2011, wedi eu rhoi i Gyngor Cyllido Addysg Uwch Cymru<sup>(5)</sup>—

- (a) swyddogaethau yn ymwneud â thalu grant newydd at ffioedd o dan reoliad 65A o Reoliadau 2011<sup>(6)</sup>;
- (b) swyddogaethau yn ymwneud ag adennill gordaliad o grant newydd at ffioedd o dan reoliad 70 o Reoliadau 2011; ac
- (c) swyddogaethau yn ymwneud â chais am wybodaeth o dan Atodlen 3 i Reoliadau 2011 a chael yr wybodaeth honno, i'r graddau y mae'r swyddogaethau hynny yn ymwneud â thalu neu adennill grant newydd at ffioedd.

4. Nid oes dim yn y Gorchymyn hwn yn atal Gweinidogion Cymru rhag arfer y swyddogaethau a ddisgrifir yn erthygl 3.

18 Gorffennaf 2012

*Leighton Andrews*  
Y Gweinidog dros Blant, Addysg, a Dysgu  
Gydol Oes, un o Weinidogion Cymru

---

<sup>(5)</sup> Sefydlwyd gan adran 62 o Ddeddf Addysg Bellach ac Uwch 1992.

<sup>(6)</sup> Mewnosodwyd yn Rheoliadau 2011 gan reoliad 17 o Reoliadau Grantiau a Benthyciadau Dysgu'r Cynulliad (Addysg Uwch) (Cymru) (Rhif 2) (Diwygio) 2012 (O.S. 2012/14 (Cy.5)).

---

## EXPLANATORY NOTE

*(Nid yw'r nodyn hwn yn rhan o'r Gorchymyn)*

Mae adran 69(5) o Ddeddf Addysg Bellach ac Uwch 1992 yn darparu y caiff Gweinidogion Cymru, drwy orchymyn, roi i Gyngor Cyllido Addysg Uwch Cymru unrhyw swyddogaethau atodol yn ymwneud â darparu addysg sydd yn eu barn hwy yn briodol neu osod y swyddogaethau atodol hynny arno.

Mae'r Gorchymyn hwn yn rhoi swyddogaethau atodol i Gyngor Cyllido Addysg Uwch Cymru. Mae'n dirymu Gorchymyn Cyngor Cyllido Addysg Uwch Cymru (Swyddogaethau Atodol) 2011 ac yn ei ailddatgan gan ystyried y diwygiadau a wnaed i Reoliadau Grantiau a Benthyciadau Dysgu'r Cynulliad (Addysg Uwch) (Cymru) (Rhif 2) 2011.

Mae'r swyddogaethau a roddir gan y Gorchymyn hwn yn swyddogaethau y caiff Gweinidogion Cymru eu harfer mewn rheoliadau a wneir o dan adran 22 o Ddeddf Addysgu ac Addysg Uwch 1998 sy'n ymwneud â thalu grant ffioedd dysgu i sefydliadau addysg uwch (ac adennill y grant hwnnw) mewn cysylltiad â myfyrwyr sy'n dechrau cyrsiau addysg uwch dynodedig ar 1 Medi 2012 neu ar ôl hynny.